

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**RJEŠENJE**  
po Prijavi koncentracije privrednog subjekta  
Nokia Corporation, Espoo, Uusimaa, Republika Finska

**Sarajevo,**  
**septembar 2015. godine**



Broj: 06-26-1-016-13-II/15  
Sarajevo: 15.09.2015. godine

Na osnovu člana 25. stav (1) tačka e), člana 42. stav (1) tačka d), a u vezi sa članovima 12, 14, 15, 16. i 18. Zakona o konkurenciji ("Službeni glasnik BiH", br. 48/05, 76/07 i 80/09), rješavajući po Prijavi koncentracije privrednog subjekta Nokia Corporation, Karaportti 3, FI-02610 Espoo, Uusimaa, Republika Finska, podnesenoj po advokatu Nihadu Sijerčiću, Fra Anđela Zvizdovića br. 1, BC UNITIC, Tower B/II, 71000 Sarajevo, Bosna i Hercegovina, zaprimljenoj dana 30.04.2015. godine, pod brojem: 06-26-1-016-II/15, Konkurencijsko vijeće na 109. (stotinudevetoj) sjednici održanoj dana 15.09.2015. godine, donijelo je

### **R J E Š E N J E**

1. Ocjenjuje se dopuštenom koncentracija koja će nastati na tržištu opreme za radio pristup mreži (uključujući prateće usluge), tzv. RAN oprema, tržištu prodaje osnovne opreme (uključujući prateće usluge), tzv. Core oprema i tržištu vršenja nepratećih usluga u Bosni i Hercegovini, sticanjem kontrole privrednog subjekta Nokia Corporation, Karaportti 3, FI-02610 Espoo, Uusimaa, Republika Finska nad privrednim subjektom Alcatel-Lucent, 148/152 route de la Reine, 92100 Boulogne-Billancourt, Republika Francuska, putem javnih tenderskih ponuda dionica u Francuskoj i Sjedinjenim Američkim Državama.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u "Službenom glasniku BiH", službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 30.04.2015. godine, pod brojem: 06-26-1-016-II/15, zaprimilo Prijavu namjere koncentracije (u daljem tekstu: Prijava), privrednog subjekta Nokia Corporation, Karaportti 3, FI-02610 Espoo, Uusimaa, Republika Finska, ujedno i podnosioca Prijave (u daljem tekstu: Nokia Corporation ili Podnosilac prijave) koga zastupa advokat Nihad Sijerčić, Fra Anđela Zvizdovića br. 1, BC UNITIC, Tower B/II, 71000 Sarajevo i privrednog subjekta Alcatel-Lucent, 148/152 route de la Reine, 92100 Boulogne-Billancourt, Republika Francuska (u daljem tekstu: Alcatel-Lucent).

Pored navedenog, Konkurencijsko vijeće je dobilo i dvije samoinicijativno podnesene dopune Prijave koje su zaprimljene dana 08.05.2015. godine pod brojem: 06-26-1-016-1-II/15 i dana 15.05.2015. godine pod brojem: 06-26-1-016-2-II/15.

Podnosilac prijave namjerava da putem javnih tenderskih ponuda dionica u Francuskoj i Sjedinjenim Američkim Državama, stekne pojedinačnu kontrolu nad privrednim subjektom Alcatel-Lucent.

Postupajući po Prijavi, Konkurencijsko vijeće je utvrdilo da ista nije potpuna i da se treba dopuniti u skladu sa članom 30. Zakona o konkurenciji ("Službeni glasnik BiH", br. 48/05, 76/07 i 80/09) (u daljem tekstu: Zakon), što je Podnosilac prijave učinio podneskom broj: 06-26-1-016-4-II/15 od 19.06.2015. godine.

Konkurencijsko vijeće je u skladu sa članom 16. stav (4) Zakona, dana 30.07.2015. godine pod brojem: 06-26-1-016-6-II/15, izdalo Obavještenje o dostavljenoj Prijavi i pozvalo sve zainteresovane strane da u roku od 7 dana, od dana objave u dnevnim novinama, dostave pisane komentare o namjeravanoj koncentraciji. Na predmetno obavještenje u datom roku nisu dostavljeni pisani komentari.

Nakon što je Podnosilac prijave dostavio svu traženu dokumentaciju, Konkurencijsko vijeće je u skladu sa članom 16. stav (2) Zakona, dana 15.09.2015. godine pod brojem: 06-26-1-016-11-II/15, izdalo Potvrdu o prijemu kompletne i uredne Prijave.

Prema navodima Podnosioca prijave, predmetna koncentracije se prijavljuje konkurencijskim tijelima sljedećih jurisdikcija: EU (Evropskoj komisiji), SAD, Brazil, Kanada, Kina, Japan, Indija, Rusija, Južna Koreja, Tajvan, Tunis i Srbija.

## **1. Učesnici koncentracije**

Učesnici koncentracije su privredni subjekt Nokia Corporation i privredni subjekt Alcatel-Lucent.

### **1.1. Nokia Corporation (Podnosilac prijave)**

Privredni subjekt Nokia Corporation, sa sjedištem na adresi Karaportti 3, FI-02610 Espoo, Uusimaa, Republika Finska, prema izvodu iz trgovinskog registra Nacionalnog odbora za patente i registraciju Republike Finske od 17.02.2015. godine, registrovan je pod matičnim brojem: 0112038-9, kao javno društvo sa ograničenom odgovornošću.

Privredni subjekt Nokia Corporation je društvo kotirano na helsinškoj i njujorškoj berzi, koje je u 2014. godini zapošljavalo preko 60.000 ljudi, u preko 120 zemalja širom svijeta i prodavalo svoje proizvode i usluge u preko 150 zemalja. Organizovana je u tri poslovne jedinice: Nokia mreže (eng: Nokia Networks) poslovna jedinica koja se bavi prodajom u segmentu mobilne infrastrukture i obavlja usluge planiranja, implementacije, pokretanja i nadogradnje mobilnih mreža operatora, HERE poslovna jedinica koja se bavi poslovima lociranja u okviru obavještajne industrije i Nokia tehnologije (eng: Nokia Technologies) poslovna jedinica koja se bavi poslovima istraživanja i razvoja, kao i razvoja i licenciranja tehnologije.

Povezana društva u kojim privredni subjekt Nokia Corporation ima 10% ili više udjela u osnovnom kapitalu, a koja su registrovana na području Bosne i Hercegovine su privredni subjekt Nokia Solutions and Networks d.o.o. Banja Luka (u daljem tekstu: Nokia Banja Luka) i privredni subjekt Nokia Solutions and Networks d.o.o. Sarajevo (u daljem tekstu: Nokia Sarajevo).

Privredni subjekt Nokia Banja Luka registrovan je kod Okružnog privrednog suda u Banja Luci rješenjem broj: 057-0-Reg-Z-15-000846 od 09.03.2015. godine, sa sjedištem na adresi Vidovdanska 2, 78000 Banja Luka, te matičnim brojem upisa: 1-15700-00 i JIB brojem: 4402536020000. Vlasnik privrednog subjekta Nokia Banja Luka sa 100% osnivačkog udjela je privredni subjekt Nokia Solutions and Networks B.V. 2712 PN Zetermeer, Werner von Siemensstraat 7, Holandija.

Privredni subjekt Nokia Sarajevo registrovan je kod Općinskog suda u Sarajevu rješenjem broj: 065-0-RegZ-15-000840 od 10.02.2015. godine, sa sjedištem na adresi Trg solidarnosti 2, 71000 Sarajevo, te

matičnim brojem upisa: 65-01-0031-11 (stari broj: 1-25933) i JIB brojem: 4201169940002. Vlasnik privrednog subjekta *Nokia* Sarajevo sa 100% osnivačkog udjela je privredni subjekt *Nokia Solutions and Networks B.V.* 2712 PN Zetermeer, Werner von Siemensstraat 7, Holandija.

Privredni subjekt *Nokia Corporation* prodaju svojih proizvoda u Bosni i Hercegovini vrši manjim kupcima, kao što su BH Telekom i Telekom Srpske i to putem direktne prodaje iz Finske, dok se usluge pružaju putem povezanih društava *Nokia Banja Luka* i *Nokia Sarajevo*.

## **1.2. Alcatel-Lucent (Ciljno društvo)**

Privredni subjekt *Alcatel-Lucent*, sa sjedištem na adresi 148/152 route de la Reine, 92100 Boulogne-Billancourt, Republika Francuska, prema izvodu iz glavnog upisa u Registar trgovine i privrednih društava Republike Francuske na dan 18.03.2015. godine, registrovan je u Kancelariji trgovinskog suda u Nanteru pod matičnim brojem: 542 019 096, kao dioničko društvo. Privredni subjekt *Alcatel-Lucent* je u vlasništvu velikog broja dioničara i ne nalazi se pod kontrolom bilo kog drugog društva.

Privredni subjekt *Alcatel-Lucent* je globalna kompanija za telekomunikacijsku opremu, koja se fokusira na hardver za fiksno i mobilno umrežavanje, kao i na konvergirani mrežni hardver, IP tehnologije, softver i usluge, sa poslovanjem u preko 130 zemalja. Organizovan je u okviru dvije poslovne jedinice: *Pristup* (eng. *Access*) poslovna jedinica koja obuhvata preklapajuće aktivnosti između učesnika u koncentraciji u oblasti RAN opreme i *Osnovno umrežavanje*, poslovna jedinica koja obuhvata preklapajuće aktivnosti u okviru *Core* opreme.

Privredni subjekt *Alcatel-Lucent* nije registrovan u Bosni i Hercegovini, niti ima registrovanih povezanih društava u kojima ima 10% ili više udjela u osnovnom kapitalu ili 10% ili više prava glasa. Prodaju na tržištu Bosne i Hercegovine obavlja direktno kupcima i kroz saradnju sa generalnim partnerima.

## **2. Pravni okvir ocjene koncentracije**

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta ("Službeni glasnik BiH", br. 18/06 i 34/10), Odluke o načinu podnošenja prijave i kriterijima za ocjenu koncentracija privrednih subjekata ("Službeni glasnik BiH", br. 34/10), te Zakon o upravnom postupku ("Službeni glasnik BiH", br. 29/02, 12/04, 88/07, 93/07 i 41/13).

## **3. Pravni osnov i oblik koncentracije**

Pravni osnov koncentracije predstavlja obavezujući Memorandum o razumijevanju, potpisan dana 15.04.2015. godine između privrednih subjekata *Nokia Corporation* i *Alcatel-Lucent*.

Pravni oblik koncentracije predstavlja sticanje pojedinačne kontrole od strane privrednog subjekta *Nokia Corporation* nad privrednim subjektom *Alcatel-Lucent*, u skladu sa članom 12, stav (1), tačka (b) Zakona.

Transakcija se provodi putem javnih tenderskih ponuda u Francuskoj i Sjedinjenim Američkim Državama. U skladu sa uslovima iz Memoranduma o razumijevanju, privredni subjekt *Nokia Corporation* će podnijeti javne ponude u kratkom roku nakon ispunjenja ili odricanja od svih uslova za zatvaranje.

Nakon provođenja predmetne transakcije, privredni subjekt Nokia Corporation će posjedovati između 50% i 100% dioničkog kapitala privrednog subjekta Alcatel-Lucent na osnovu potpune raspodjele. U slučaju da privredni subjekt Nokia Corporation posjeduje manje od 95% dioničkog kapitala privrednog subjekta Alcatel-Lucent na zatvaranju transakcije neophodnih za prinudni otkup dionica, privredni subjekt Nokia Corporation zadržava pravo da načini dodatne korake u cilju sticanja 100% dioničkog kapitala privrednog subjekta Alcatel-Lucent.

#### 4. Relevantno tržište

Podnosilac prijave je u istoj naveo da smatra da za potrebe Prijave nije neophodno konačno definisati relevantno tržište proizvoda, iz razloga što predmetna transakcija neće imati uticaja na konkurenciju u Bosni i Hercegovini, s obzirom da se aktivnosti učesnika u koncentraciji ne preklapaju u Bosni i Hercegovini. Nakon traženja Konkurencijskog vijeća, da Podnosilac prijave mora definisati relevantno tržište predmetne koncentracije, to je isti i učinio, te u dopuni Prijave odredio slijedeća relevantna tržišta proizvoda:

- Tržište opreme za radio pristup mreži (uključujući prateće usluge), tzv. RAN oprema (eng. Radio Access Network equipment);
- Tržište prodaje osnovne opreme (uključujući prateće usluge), tzv. Core oprema (eng. Core Network System equipment);
- Tržište vršenja nepratećih usluga (eng. Non-attached Services).

Prema Podnosiocu prijave, navedena relevantna tržišta proizvoda su jedina tržišta na kojima učesnici u koncentraciji imaju horizontalna preklapanja, ali samo na svjetskom nivou.

#### 5. Analiza relevantnog tržišta

Procjena učešća učesnika u koncentraciji i glavnih konkurenata na relevantnom tržištu prodaje opreme za radio pristup mreži (uključujući prateće usluge), tzv. RAN oprema, u Bosni i Hercegovini, prikazana je u Tabeli br.1, kako slijedi.

Tabela br. 1

Naziv privrednog subjekta	Procjena tržišnog udjela (%)
<b>Nokia Corporation</b>	(..)** <sup>1</sup>
<b>Alcatel-Lucent</b>	(..)**
Huawei	(..)**
Ericsson	(..)**
Ostali	(..)**

Izvor: podaci iz Prijave

Procjena učešća učesnika u koncentraciji i glavnih konkurenata na relevantnom tržištu prodaje osnovne opreme (uključujući prateće usluge), tzv. Core oprema, u Bosni i Hercegovini, prikazana je u Tabeli br.2, kako slijedi.

Tabela br. 2

Naziv privrednog subjekta	Procjena tržišnog udjela (%)
<b>Nokia Corporation</b>	(..)**
<b>Alcatel-Lucent</b>	(..)**
Huawei	(..)**

<sup>1</sup> podaci predstavljaju poslovnu tajnu u smislu člana 38. Zakona o konkurenciji

Ericsson	(..)**
Ostali	(..)**

Izvor: podaci iz Prijave

Procjena učešća učesnika u koncentraciji i glavnih konkurenata na relevantnom tržištu vršenja nepratećih usluga u Bosni i Hercegovini, prikazana je u Tabeli br.3, kako slijedi.

Tabela br. 3

Naziv privrednog subjekta	Procjena tržišnog udjela (%)
<b>Nokia Corporation</b>	(..)**
<b>Alcatel-Lucent</b>	(..)**
Huawei	(..)**
Ericsson	(..)**
Ostali	(..)**

Izvor: podaci iz Prijave

Procjene tržišnih učešća za sva tri relevantna tržišta data su od strane Podnosioca prijave, kao njegove procjene, a na osnovu prihoda ostvarenog od prodaje relevantnih proizvoda u Bosni i Hercegovini.

S obzirom da privredni subjekt Alcatel-Lucent nije prisutan ni na jednom od relevantnih tržišta, nakon provođenja koncentracije zajedničko tržišno učešće učesnika u koncentraciji na relevantnim tržištima će ostati nepromjenjeno.

## 6. Obaveza prijave koncentracije

U skladu sa članom 14. Zakona, analizirani su podaci iz Prijave radi utvrđivanja postojanja uslova za obavezu prijave koncentracije, a vezano za ukupan godišnji prihod učesnika koncentracije u godini koja je prethodila koncentraciji:

Tabela br. 4

Ukupan prihod učesnika u koncentraciji ostvaren u 2014. godini (KM)				
Privredni subjekt	Nokia Corporation	Nokia Banja Luka	Nokia Sarajevo	Alcatel-Lucent
Svijet	(..)**	(..)**	(..)**	(..)**
BiH	(..)**	(..)**	(..)**	(..)**

Izvor: podaci iz Prijave

Iznos koji je privredni subjekt Nokia Corporation ostvario u 2014 godini na svjetskom tržištu (naveden u Tabeli br.4) ne obuhvata iznos od (..)\*\* KM prihoda ostvarenog od strane poslovne jedinice Uređaji i Prateće Usluge (engl. Devices & Services), koja je 25.04 2014. godine prodana privrednom subjektu Microsoft.

Ukupan prihod koji je privredni subjekt Alcatel-Lucent ostvario u 2014. godini na tržištu Bosne i Hercegovine (naveden u Tabeli br.4) obuhvata prihod koji je ostvaren direktnom prodajom kupcu u Bosni i Hercegovini i to privrednom subjektu Telekom Srpske, kao i prodajom posredstvom generalnog partnera u Bosni i Hercegovini, privrednog subjekta MIBO komunikacije d.o.o. Sarajevo, kao preprodavca koji je vršio dalju prodaju, uglavnom privrednom subjektu BH Telekom.

Prema podacima iz Tabele br. 4, učesnici koncentracije u 2014. godini ostvarili su ukupan godišnji prihod koji podliježe obavezi prijave koncentracije.

## **7. Ocjena koncentracije**

Konkurencijsko vijeće je utvrdilo da se u predmetnom slučaju radi o namjeri koncentracije privrednih subjekata koji nisu registrovani u Bosni i Hercegovini i koji nemaju horizontalnih preklapanja na relevantnom tržištu.

U skladu sa navedenim, Konkurencijsko vijeće smatra da predmetna koncentracija neće sprječavati, ograničavati niti narušiti tržišnu konkurenciju na relevantnom tržištu, te je odlučio kao u dispozitivu ovog Rješenja.

## **8. Administrativna taksa**

Podnosilac prijave na ovo Rješenje, u skladu sa članom 2. Tarifni broj 107. stav (1) tačka d) pod 1) Odluke o visini administrativnih taksi u vezi s procesnim radnjama pred Konkurencijskim vijećem ("Službeni glasnik BiH", br. 30/06 i 18/11) dužan je platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

## **9. Pouka o pravnom lijeku**

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

**Predsjednica**

**Maida Čampara**